


TEZAU LITURGIC

9 SEPTEMBRIE

SLUJBA SF. 15 CUVIOȘI DE LA GLINSK II



MOSCOVA, 2000



Месяца сентября в 9-й день Собор преподобных отцев Глинских

На велицей вечерни

Блажен муж: 1-й антифон.

На Господи, воззвах: стихиры праздника 3, глас 1
(зри месяца сентября в 9-й день) и святых 5.
Аще кроме праздника, стихиры святых на 8,
глас 2.

Подобен: Киими похвальными венцы:

Киими похвальными венцы / увязем
преподобных отцев Глинских? / Разделенныя
телесы, и совокупленныя духом, /
Богоизбранную и всечестную шестинадесятицу,
/ Духа Святаго дарования преисполненную; /
монашества и старчества светильников, /
Православия столпов непоколебимых, / учения
евангельскаго истинных наставников, //
подающих миру велию милость.

Киими песненными гласы / восхвалим святых
отцев, в пустыни Глинстей просиявших? /
Филарета Богомудраго, / обители возобновителя
и возродителя духовнаго; / Богоноснаго
Василия, / умнаго делания рачителя и
добротолюбия наставника; / Феодота
препростаго, / чистотою и незлобием

младенствовавшего; / Макария блаженного, / от
ангела Божия старчества повеление приемшаго;
/ молитвенников теплейших за ны ко Господу,
// подающему нам велию милость.

Киими достойными похвалы / увенчаем
преподобных старцев Глинских? / Мартирия,
воздержания ревнителя, / псалмопевца и имене
Господня хвалебника; / смиренномудраго
Евфимия, / алтаря святилища многолетнего
служителя; / Илиодора светлейшаго, дару солнца
тезоименитаго, / дары духовныя от Солнца
Правды Христа Бога восприявшаго; / Досифея
благоговейнаго, / ангельское пение при кончине
старца Феодота слышати сподобившагося; /
преподобническими венцы увязенных от Христа
Бога, // подающаго вами нам велию милость.

Киими хвалебными гласы / воспоем лик
Богодостойных отец? / Благоутробнаго
Иннокентия, / отца чадолюбиваго и
милосерднаго; / Иоанникия, скитскаго жития
устроителя, / устава и правил церковных
ревнителя; / Богомудраго Серафима, /
окормления старческаго во обители возродителя;
/ Архиппа и Луку, союзом любви духовныя
связуемых; / тесноты иноческаго жития
терпения образы, // подающии миру велию
милость.

Киими песненными добротами / украсим
Божественный сонм преподобных отец, / во дни
гонения на Церковь и на веру Православную
просиявших? / Святителя Серафима, / старца
духоносного и архиерея преславного земли
Иверския; / Серафима, Абхазии украшение, /
обители Глинския духовника и тайноведца душ
человеческих; / Андроника исповедника, /
труженика смиренного на ниве Христовой; /
великого ангельского образа совершенства
восприемников, // подающих миру велию
милость.

Слава, глас 8:

Приидите, вернии, / во обитель Глинскую
притецем, / приидите, да сердца согреемся и
просветимся, / на свещнице бо тыя возжглася
свеща многосветлая преподобных отец, /
горящи и светящи всему миру дарования
духовными, / елеем дел благих светильники своя
украсивших, // освящая и просвещая души
наша.

И ныне, праздника, глас 6. Самогласен:

**Днесь Иже на разумных Престолах: (писан на
праздник).**

Аще ли случится в пяток вечера:

**Слава, праздника, И ныне, Богородичен первый
гласа настоящего.**

Вход. Прокимен дне. И чтения три.

Премудрости Соломоновы чтение (главы 5 и 6):
Праведницы во веки живут, и в Господе мзда их, и попечение их у Вышняго. / Сего ради примут Царствие благолепия и венец доброты от руки Господни, / зане десницею покрывает их и мышцею защитит их. / Приимет всеоружие рвение Свое и вооружит тварь в месть врагом. / Облечется в броня правды и возложит шлем, суд нелицемерен. / Приимет щит непобедимый, преподобие. / Поострит же напрасный гнев во оружие; / споборет же с ним мир на безумных. / Пойдут праволучныя стрелы молниины / и, яко от благокругла лука облаков, на намерение полетят. / И от каменометных ярости исполнь падут грады, / вознегодует на них вода морская, реки же потопят я нагло. / Сопротив станет им дух силы, и, яко вихор, развеет их / и опустошит всю землю беззаконие, и злодейство превратит престолы сильных. / Слышите убо, царие, и разумеите, навыкните, судии концев земли. / Внушите, держащие множества и гордящиеся о народах языков, / яко дана есть от Господа держава вам и сила от Вышняго.

Премудрости Соломоновы чтение (глава 3):

Праведных души в руце Божией, и не прикоснется их мука. / Непщевани быша во очесех безумных умерети, и вменися озлобление исход их. / И еже от нас шествие сокрушение, они же суть в мире. / Ибо пред лицом человеческим аще и муку примут, упование их безсмертия исполнено. / И в мале наказани бывше, великими благодетельствовани будут, / яко Бог искуси я и обрете их достойны Себе. / Яко злато в горниле искуси их, и яко всеплодие жертвенное прият я. / И во время посещения их возсияют и, яко искры по стеблию, потекут. / Судят языком и обладают людьми, и воцарится Господь в них во веки. / Надеющиеся Нань разумеют истину и вернии в любви пребудут Ему. / Яко благодать и милость в преподобных Его, и посещение во избранных Его.

Премудрости Соломоновы чтение (глава 4):

Праведник, аще постигнет скончаться, в покои будет. / Старость бо честна не многолетна, ниже в числе лет исчисляется. / Седина же есть мудрость человеком, и возраст старости житие нескверное. / Благоугоден Богу быв, возлюбен бысть, и живой посреде грешных преставлен бысть. / Восхищен бысть, да не злоба изменит разума его, или лесь прельстит душу его. /

Рачение бо злобы помрачает добрая, и парение похоти пременяет ум незлобив. / Скончався в мале, исполни лета долга. Угодна бо бе Господеви душа его, сего ради потщася от среды лукавствия. / Людие же видевше и не разумевше, ниже положше в помышлении таковое. / Яко благодать и милость в преподобных Его, и посещение во избранных Его.

На литии стихира праздника, глас 1.

Таже святых, глас тойже:

Небо и земля, море и воздух, и вся, яже в них, / повинуются тому, егоже сердце страха Божия исполнено, / сего ради чудотворения дивная в вас быша, преподобнии: / немокренно водою шествова Иоанникий, / Филарет зрит душу праведничу ангелы несому, / Архип чудно путь во обитель осветил есть, / ангел Божий Феодота возбуждает на молитву, / Досифей же пением ангельским утешается; / паче же исцеления и пророчества изливасте богато, отцы Богоноснии, / идеже бо Бог, превысший естества, Свое присутствие являет, // тамо побеждается естества чин.

Слава, глас 6:

Един и Тойжде действуяй Дух Святый, / разделяя властью дарования коемуждо, якоже

хочет, / овому даде слово премудрости, / иному же — слово разума, / другому же — веру, / иному же — дарования исцелений, / другому же — действия сил, / иному же — пророчество, / другому — разсуждения духовом; / вы же, отцы преподобнии, / вся сия явления Духа на пользу приемше, / дарований больших поревновали есте, // сего ради еще по превосхождению путь вам от Господа показася.

И ныне, праздника, глас 8: В благознаменитый день: (писан на праздник).

На стиховне стихиры, глас 2.

Подобен: ДOME Евфрафов:

Пустынь Глинская, / цветник духовный, / украшай твой дом, / в немже Божественный // сонм преподобных отец прославися.

Стих: Честна пред Господом / смерть преподобных Его.

Церковь Христова, / красуйся и ликуй, / се бо преподобныя твоя / Престолу Владычню // во славе предстоят радующиеся.

Стих: Блажен муж, бояйся Господа, / в заповедех Его восхощет зело.

Соборе святых отцев Глинских, / полче Богоносный, / молитесь ко Господу / о возрождении монашества в земнем Отечестве вашем // и о почитающих вас любовью.

Слава, глас 1:

Павел апостол Онисима из беглаго раба
мучеником соделал есть, / Илия из землепашца
пророка Елиссея приуготови, / Моисей Иисуса
более всех украси совершенствами; / вы же,
отцы преподобнии, / достойнии ученицы
наставников своих явистесь, / разуму и
премудрости от них научившесь, / глаголали
есте, от Духа Святаго просвещаемы, / святии
Божии человецы, // истины Христовы
провозвестницы.

И ныне, праздника, глас 8: Приидите, вси
вернии: (писан на праздник).

На благословении хлебов тропарь святых,
дважды,
и тропарь праздника, единожды.

Тропарь святых, глас 4:

Преподобнии и Богоноснии отцы наши
Глинстии, / ученьми древних отцев старчество в
обители утвердившии, / молитвою, кротостию,
постом и смирением / в послушании любовь
Христову стяжавшии: / во дни гонения в
разсеянии за веру Православную, / яко звезды
на небесех всю вселенную просветившии / и ко
Христу приведшии. / Молитесь ко Господу, //
помиловати и спасти души наша.

Ин тропарь, глас тойже:

Грозд старчества на лозе преподобства
израстивший, / преподобнии отцы старцы
Глинстии, / земли Русския печальницы / и
народа Божия ко спасению наставницы, /
Владыку всех молите / мир вселенней даровати
// и душам нашим велию милость.

**Служба Богоотцев Иоакима и Анны поется на
повечерии.**

На утрени

**На Бог Господь: тропарь праздника, дважды.
Слава, святых. И ныне, праздника.**

По 1-м стихословии седален, глас 6:

В Писании указа нам Бог спасения путь: /
вопроси отца твоего, и возвестит тебе, / старцы
твоя и рекут тебе, / Святой бо Дух научает
отцы, яже подобает рещи, / смирения ради и
правоты сердца вопрошающих. / Вы же, старцы
Глинстии преподобнии, / яко уста Господня
явились есте, / волю Божию народу
возвещающе, / Богомудрыми словесы души
человеков к Богу приводяще.

**И ныне, праздника, глас 3: Дева днесь:
(зри месяца сентября в 9-й день)**

По 2-м стихословии седален, глас 5:

Утаение греха недугующему смерть уготовляет, /
жало бо, рече апостол, смерти — грех. / Сего
ради вы поучасте, отцы преподобнии: / да
никтоже сокрывает помыслы своя, / но старцем
исповедует, / исповедание бо истинного
покаяния и грехов прощения основание есть, /
и надежда спасения душе, // с печалию о гресех
истинно кающейся.

**И ныне, праздника, глас 4: Давиде, яже клятся
тебе:**

(зри месяца сентября в 9-й день)

Величание

Ублажаем вас, / преподобнии отцы наши
Глинстии, / и чтем святую память вашу, /
наставницы монахов // и собеседницы ангелов.

Избранный псалом преподобным.

По полиелеи седален, глас 5:

Якоже бо тело едино есть и уды имать многи, /
все же уды мнози едино тело суть; / тако и вы,
отцы преподобнии, / мнози едино тело есте о
Христе, / имуще дарования по благодати данной
вам различна, / и аще един славится уд, / с ним
радуются и прославляются все уды, // в Соборе
святых, во обители Глинстей просиявших.

**И ныне, праздника, глас 8: Да радуется небо, и
земля да веселится:**

(зри по полиелеи в день праздника)
Степенна, 1-й антифон 4-го гласа.

Прокимен, глас 4: Честна пред Господом /
смерть преподобных Его. Стих: Что воздам
Господеви о всех, яже воздаде ми?

Всякое дыхание: Евангелие от Матфея, зачало
43.

По 50-м псалме стихира, глас 6:

Не даст Господь преподобному Своему видети
истления, / не умроша бо святии, но сном
честным уснуша. / Темже, яко многоценное
сокровище, в земли сокровенное, / честныя
мощи ваша нам являет, / преподобнии отцы
Глинстии, / яже с любовью лобызаем, // и
святую память вашу ублажаем.

Канон праздника первый
со ирмосом на 6 (ирмосы по дважды, тропари на
4), глас 2.

И святых на 8, егоже краегранесие: Глинския
обители отцев в песнях прославим. Глас тойже.

Песнь 1

Ирмос: Грядите, людие, / поим песнь Христу
Богу, / раздельшему море и наставльшему люди,
/ яже изведе из работы египетския, // яко
прославися.

Припев: Преподобнии отцы наши Глинстии,

молите Бога о нас.

Грядите, людие, в обитель пустынно-Глинскую, /
поим песнь Христу Богу, / собор отцев
преподобных в ней Явившему, / яко
прославися.

Любителя добродетели тезоименного, / мудраго
настоятеля и строителя Филарета восхвалим, /
обители возобновителя и возродителя духовного,
/ непрестанными труды и подвиги добродетели
иноческия воплотившаго, / и твердое основание
Богородицкия Глинския пустыни положившаго.

Илиодоре священне, / Святителя Христова
Николая пестуна имевый, / дващи заступлением
Чудотворца сего смерти избегнувый, / третицею
же в Мирех Ликийских при гробнице Святителя
/ милость Божия елеем радости из кандила на тя
излияся.

Богородичен: Непогоды раждает Храм Божий,
Едину Богородицу, / радуются днесь Иоаким и
Анна, / и обитель Глинская духовно
торжествует, / се бо Дева происходит от утробы
неплодных / во спасение душ наших.

Катавасия по уставу.

Песнь 3

Ирмос: Утверди нас в Тебе, Господи, / Древом
умерщвлей грех, / и страх Твой всади // в
сердца нас, поющих Тя.

Святые Горы Афонския устава восприемницу, /
обитель Глинскую в отцах ея прославим, /
преподобнаго и богоноснаго старца Паисия
наследницу, / и пустыни Оптиной сродницу
духовную.

Крины сельныя вы есте, отцы Боголюбивии, /
добротолюбием и доброделанием в лузе
духовнем обители Глинския процветшии, / и
святостию жития во Христе вселенную всю
облагоухавшии.

Имже несть управления, падают, аки листвие, /
спасение же есть во мнозе совете, — Притча
рече; / ты же, Богомудре Филарете, сие слово
Писания добре ведая, / старчество в вертограде
пустыни Глинския насадил еси, / еже израсти
мирови великих и богодохновенных отец.

Богородичен: Яко миром благовонным, / ум и
сердце благоухаша преподобнии отцы, /
Сладчайшее Имя Твое призывая, Пречистая, /
денно и ночью взывающе: / Пресвятая
Богородице, спаси нас!

Кондак и икос праздника, глас 4.

Ин кондак святых, глас 8:

Наследницы древних отцев бысте, преподобнии,
/ тех последуя житию и учению, / обычаю и
воздержанию, / молитве и предстоянию. / С
нимиже, имея дерзновение ко Господу, /

прощение согрешений и спасение испросите
вопиющим вам: / радуйтесь, отцы Богоноснии,
// пустыни Глинския благое прозябение.

Седален святых, глас 4:

Радуйся, пустынь Глинская, / благодать
старчества унаследовавшая, / лечебнице
недугов душевных и телесных, / училищем
велиим жития иноческаго от преподобнаго
Серафима Саровскаго нарекаясь, / и собором
Богоносных отец, zde просиявших,
возвеличенная. / Сего ради и мы со умилением
зовем им: // радость возвещает прославление
ваше всей вселенной.

И ныне, праздника, глас тойже: Дева Мария:
(писан на праздник).

Песнь 4

Ирмос: Услышах, Господи, / слух Твоего
смотрения / и прославих Тя, // Едине
Человеколюбче.

О, чудесе, достойнаго всех древних чудес! /
Ходя по реце верху вод яко по суху, / на он пол
немокреныма ногама прешел еси, /
тезоименнаго ти аввы Великаго чудо повторяя. /
О, красных ног! О, чудеснаго шествия твоего, /
Иоанникие преподобне.

Блажен еси, миротворче преподобне Серафиме,

/ мир Христов, сие сокровище смиренномудрых
твоея души, людем источал еси, / благодатным
миром духовным братию обители соединяя, /
молитвою и любовью отеческою в подвизех
жития иноческаго их укрепляя.

Иннокентие, благоутробне и милосердне, /
состраданием и любовью Христовою ко всем
страждущим и бедствующим преисполненный,
/ недузи и болезни оных молитвою врачуя, / и
кончиною праведною святость жития своего
явил еси.

Богородичен: Труды неусыпныя благоустроения
ради обители Твоея, Владычице, подъял есть
преподобный Филарет, / велию любовь и
благоговение к Тебе имея, / сего ради в Жизнь
Вечную преселися в день Иверския Твоея
иконы, / еюже и во обитель Глинскую
благословение приял есть.

Песнь 5

Ирмос: Сеннописанный мрак гаданий разорив /
и верных прибытием истины, /
Богоотроковицею, озарив сердца, // и нас
светом Твоим, Христе, настави.

Егда велий подвиг странствования совершил
еси, отче Василие, / во Святей Горе Афонстей и
в стране Молдавстей подвизаяся, / во обители
Святыя Руси преподобнаго старца Паисия

учение принесл еси, / и иноков научил еси ум к Богу возводити и сердцем к Нему взывать: / Господи, Иисусе Христе, Сыне Божий, помилуй мя, грешнаго.

Любовию вся покрывал еси, блаженне Макарие, / сия бо, по слову апостола, не ищет своих си, / немощи немощных и тяготы братии носил еси, не себе угождая, / и тако исполнил еси закон Христов.

Иже хранит уста своя и язык, соблюдает от печали душу свою, — Притча глаголет; / ты же, отче Луко, в словесех Премудраго умудряся, / был еси яко человек не слышай и не имый во устех своих обличения, / за словеса устен Господних пути жестоки сохранил еси, / глухотою мнимою подвиг молчания сокрыв.

Богородичен: О, коль близ есть Пресвятая Богородица почитающим Ея, / во храме освященном яко Светоносная Жена старцу Илиодору является, / и знамение сие велие Царицы Небесныя благоволение есть, / и обители Ея Святаго Имене Матернее благословение.

Песнь 6

Ирмос: Ко Господу от кита Иона возопи: / Ты мя возведи из глубины ада, молюся, / да яко Избавителю, во гласе хваления, // истины же

духом пожру Тебе.

Типиконом живым знания устава церковного ради от братии наречен был еси, отче Евфимие, / древним отцем, в пустыни подвизавшимся поревновал еси, / сего ради и келлию свою яко вертеп устроил еси, / великим столпам иночества по духу подражая.

Царствие Небесное нудится, и нуждницы восхищают е. / Ты же, отче Архиппе, злострадания и долготерпения образ на тесном пути иночеством приял еси, / буйством Христа ради мудрость Божественную приобрет, / премудрость Божию, в тайне сокровенную, юродством проповедал еси.

Емшися за вечную жизнь, в нюже и зван был еси, блаженне Феодоте, / страдания нынешняго века нивчтоже вменил еси, / поношения и заушения кротко претерпел еси, / и яко воду жизни, — по слову аввы горы Синайския, — испил еси поругание от всякаго человека.

Богородичен: Вратарнице благая, / сохраняй входы и исходы обители Глинския, / над святыми враты неусыпно на стражи стоящи, / и врата Царствия Небеснаго милостивно нам отверзи.

Кондак, глас 4:

Днесь ликует обитель Глинская, / в
прославлении преподобных отцев, в подвиге
добрем просиявших, / и вси людие
возвеселишася, / яко источник благодати
чудесы изливается. / Темже убо, святии,
печальницы душ наших, / умолите
щедролюбиваго Бога, // молитвами Богородицы
Небеснаго Царствия сподобитися.

Икос:

Се что добро, или что красно, / но еже жити
братии вкупе, / брат бо от брата помогаемь, яко
град огражден есть; / вы же, преподобнии отцы,
/ во общаго жития братолюбии / пустынь
Глинскую яко град тверд и до Небес высок
созиждали есте, / укрепляемый якоже
основанное царство, / и граждан своих земных
// молитвами Богородицы Небеснаго Царствия
сподобляюще.

Долженствует убо месячный синаксарий по
шестой песни канона яко обычай читатися. Сие
бо от святых и Богоносных отец учинися.

Синаксарий

Стихи: Поминати наставники подобает,
тии бо бдят о душах наших.

В сей благознаменитый день, память совершаем преподобных отец, во обители Глинстей просиявших. Понеже убо Богоноснии отцы сии во обители Пресвятыя Богородицы Пречистаго Рождества подвигом добрым подвизашася, сего ради и собор их по празднице Богородичном совершати подобает.

Пустынь Глинская, сие, по слову преподобнаго Серафима Саровскаго, училище велие жития иноческаго, дарова мирови сонм Богоносных отцев, старцев, сей цвет иночества и монашества украшение, иже наследие преподобнаго отца Паисия, сиречь старчество, в вертограде пустыни Глинския насадиша и возрастиша.

Сего же полка Божественнаго преподобных отец имена сия суть: Филарет Богомудрый, обители Глинския строитель и возродитель духовный; Василий, добротолубия наставник и умнаго делания рачитель; Феодот препростый, младенец незлобием и чистотою; Макарий блаженный, тяготы братии носивший; Мартирий псалмопевец, воздержания ревнитель; смиренномудрый Евфимий, древним отцем пустынным по духу подражатель; Досифей благоговейный, нестяжанием обогатившийся; Илиодор светлейший, в горниле тяжких испытаний чистее злата очищенный; Иннокентий благоутробный, сердце милующее стяжавший; Архипп, Христа ради юродствовавший; Лука, глухотою подвиг молчания сокрывший; Иоанникий чудотворец, немокренно по воде пешествовавый; Серафим миротворец, отец отцев и братии ограда; старец и святитель Серафим, удела земнаго Пресвятыя Богородицы во святей Иверии архиерей преславный; Серафим, обители Глинския духовник, Абхазии красота и слава; Андроник исповедник, печальник и тайноведец душ человеческих.

Сии Богопросвещеннии отцы преподобнии подвиги и труды своими богато плоды духовныя от Христа Бога нашего стяжаша, яже суть: любы, радость, мир, долготерпение, благость, милосердие, вера, кротость, воздержание,

пророчество, чудотворения, прозрение, наипаче же Богомудрое разсуждение, сей «светильник души» и «жития кормило», якоже святии отцы рекоша, имже мнози души страждущия уврачеваша и ко спасению приведоша. «Иже сотворит и научит, — Господь рече, — сей велий наречется в Царствии Небеснем». Сии шестнадцать Богодостойных отец вся заповеди Христовы сотвориша и мнозем добродетелем чад своих научиша, наипаче же: помыслов откровению, послушанию блаженному и своя воли отсечению, и от святых отец учения сице глаголаша. Подобае убо помыслы стужающыя исповеданием изъясляти, оглашаеми бо, прогоняеми бывают. Якоже бо свету сияюще, тьма уступает, тако и свет исповедания потребляет помыслы страстей, яко и сии тьма суть. «Имже несть управления, падают, аки листвие, спасение же во мнозе совете есть». Послушание же вечныя жизни залог есть. Послушание бо и лютыя звери укротити может: свидетель словеси сему, иже отчу заповедь приим, связа гиену. Послушание и мертвыя чудотворити показывает: и се яве есть, от гроба возгласив Акакий. И Сам убо Сын Божий послушлив быв до смерти крестныя, еюже миру спасение содея. Аще не бы сотворил Господь послушания и воли Своя не отрекся, не бы спасся человек. Такожде не спасается человек, иже своя воли держится. А иже отцу своему духовному о Бозе покаяется, блажен есть и Сына Божия подобник, и тако спасение свое вечное соделоват.

Преподобных и Богоносных отец наших Глинских молитвами, Господи Иисусе Христе, Боже наш, помилуй нас, аминь.

Песнь 7

Ирмос: Купина в горе огнеопальная и
росоносная пещь халдейская / яве предписа Тя,
Богоневесто, / Божественный бо

невещественный в вещественном чреве Огнь
неопально прияла еси. / Темже из Тебе
Рождшемуся поем: // благословен еси, Боже,
отец наших.

Вольная нищета богатство монаха есть, / и
вышних благ вкусивший презирает земная; / ты
же, отче Досифее благоговейне, / богат сый
нестяжанием, / сокровище свое на Небеси
сокрыл еси, / вся попечения своя возложив на
Господа, / Бога отец наших.

Плоти со страстями и похотями распятие
претерпел еси, отче Мартирие, мучениче
безкровне, / по имени твоему и житие твое, /
принуждение себе во всяцем деле, яко делание
иноческое, по слову аввы Захарии, творил еси, /
ветхаго человека умерщвляя ради Христа, /
Господа Бога отец наших.

Естества ветхаго человека сладости текущая и
сластныя презрел еси, отче Архиппе, / ведал бо
еси со апостолом, яко пострадавый плотию
преста от греха, / плечи твоя вдал еси на раны
и ланиты на заушение, / лица же твоего не
отвратил еси от студа заплевания, / язвы на
теле нося Господа Иисуса Христа, / Бога отец
наших.

Богородичен: Се, ныне неплодные утробы
отверзаются, / естества нашего разрешая
неплодство, / се, ныне Дева раждается, и мир

обновляется, / рождения нашего духовного в Жизнь Вечную и обновления знамение совершается.

Песнь 8

Ирмос: В печи отрочестей прообразил еси иногда Твою Матерь, Господи, / образ же Сия из огня изымаше неопально входящая, / Юже поем, являющуюся Тобою концем днесь, // и превозносим во вся веки.

Наставниче монахов, Богомудре Филарете, / и преподобного Серафима Саровского по духу собеседниче, / сподобился еси видети душу онаго, со славою ангелы на Небо несому, / и со безплотными поюще Господа Бога во вся веки.

Единствовав в трапезе братстей, отче Феодоте, препросте, / молитва же твоя бысть аки столп пламеновидный от земли до неба, / блажени бо чистии сердцем, яко тии Бога узрят, / поюще и превозносяще Его во вся веки.

Хвалебное псалмопение непрестанно возносил еси, отче Мартирие, / Богодохновенную Псалтирь на кийждо день изустно совершая, / и тако славословие выну от сердца Господу Богу изливал еси, / поя и превознося Его во вся веки.

Пресвятая Богородицы удела земнаго архиерее преславный, / святителю и старче Серафиме богоблаженне, / наследия духовного обители

Глинския верный последователю, / Промыслом Божиим служение свое в земли Иверстей совершал еси, / и ныне, праведниче Божий, в памяти нашей будеши во вся веки.

Рече апостол: подвизаяйся, от всех воздержитися, да неистленен венец приемлет; / ты же, отче Серафиме, преподобне, / велия труды бодрствования и трезвения непрестанного подъял еси, / себе отвергся, спасения пасомых ради, / вождю духовный и печальниче душ человеческих, / и подвиги твоими в земли Абхазстей / пустынь Глинскую прославил еси во вся веки.

Отче Андрониче Богомудре, / око души своя рассуждением просветил еси, / якоже отцы рекоша, / и светильник ея елеем премудрости украсил еси, / ведче искусный сердец человеческих; / и во граде Тбилиси под Покровом Пречистыя подвизался еси / с собеседником и сотаинником Виталием блаженным, / истинным Евангелия Христова послушником; / и ныне на Небесех со отцы Глинскими купно водворяетесь, / молящеся Господу Богу спастися нам во вся веки.

Троичен: Святая Троице Единосушная, / мольбами преподобных и Богоносных старцев Глинских, / да не отлучимся Твоя славы, / от отцев бо поклонятися навыхом Единому

Естеству Триипостасному.

Богородичен: Луку, молитвы делателя, гласом от иконы Твоея утешила еси, Владычице, рекши: / рабе Божий, храни веру благую Православную, / и сим оправдишися во вся веки.

Песнь 9

Ирмос: Яже прежде Солнца Светильника Бога возсиявшего, / плотски к нам пришедшаго, / из боку Девичу неизреченно воплотившая, / Благословенная Всечистая, // Тя, Богородице, величаем.

Августейшаго Дома благоволение снискавый, преподобне Филарете, / во граде святого Петра яко Православия поборник прославился еси, / иноческаго отческаго жития устроение от еретических лжеучений защищая, / Духом Святым просвещаемый.

Во огни злато искушается, / и человецы приятни Богу в печи смирения. / Тако и ты, отче Илиодоре многострадальне, / горнило тяжких испытаний во очищение души прошел еси, / клевету, напраслину и изгнание из обители претерпев, / и сердце милующее от Господа стяжал еси, / во еже всем оскорбляемым и гонимым сострадати.

Иже аще хочет в вас вящий быти, да будет всем слуга, — рече Господь, / ты же, отче

Евфимие смиренномудре, / страсть честолюбия презрев, священнаго сана уклонился еси, / всем быв рабом последним и меньшим слугою, / сего ради велий еси ныне в Царствии Небеснем.

Богородичен: Монашескаго жития начало в пустыни Глинстей явлением чудотворныя иконы Твоя положила еси, Пречистая Дево, / и ныне молим Тя смиренно, / да будет обитель Твоя иночества украшением / и старчества в земли нашей возрождением.

Светилен, глас 1:

Учителіе Евангелія словом и житіем бысте, преподобнии, / сего ради ныне от Господа во святых прославлени есте; / иже бо сотворит едину заповедь Христову и тако научит человеки, / сей велий наречется в Царствии Небеснем.

Слава, и ныне, праздника: От неплодныя днесъ:

На хвалитех стихиры праздника 3, глас 6 (зри на стиховне утрени в 9-й день) и святых 3. Аще кроме праздника, стихиры святых на 4. Аще неделя, стихиры воскресны 4 и святых 4 со славником и припевы своими (зри на стиховне вечерни), стихиры праздника оставляются.

Стихиры святых, глас 5.

Подобен: Преподобне отче:

Преподобнии отцы Глинстии, / нива души
вашея плоды духовными угодися: / любовью,
радостью, миром, долготерпением, / благостью,
милосердием, верою, / кротостью,
воздержанием, / и большими сих дарованиями, /
многплодно житницу Небесную наполнили есте,
// и ныне молитесь о душах наших.

Преподобнии старцы Глинстии, / блаженное
послушание возлюбившии, / Христа ради отцем
своим себе поработившии, / сего ради
преуспесте и возвеличестесь, / якоже и Иисус,
сын Сирахов, рече: / не отступай от повести
старцев, / ибо тии навыкоша от отцев своих, /
яко от них навыкоша разуму / и во время
потребно отвечавати. / Мы же, братие, стопам
отцев последующе, / повинувимся наставником
нашим и о Боже покараемся, // тии бо бдят и
молятся о душах наших.

Преподобнии отцы Глинстии, / свободни бывше
от всех, всем себе поработили есте, / да
множайшии души во спасение приобрящете: /
радовастесь с радующимися и с сущими в
скорби печалистесь, / страждущим
спострадасте, недужных уврачевасте, /
неможных и в вере колеблющихся утвердисте, /

всем бысте вся, да всяко некия спасете, / и ко Господу приведете, // молящся о душах наших.

Слава, глас 4:

Изшедший из Египта имеша наставником Моисея, / бежавший же из Содома — ангела Божия; / мы же, хотящий душевныя и телесныя нечистоты совлечься, / кормчих имамы преподобных отец, / ходатаев к Богу и мужей равноангельных, / иже стояще посреде деяния и видения, / воздевают руце за ны ко Господу, / дабы, наставляемии ими, / море греховное пешешествовали, // и Амалика мысленного страстей возмогли победити.

И ныне, праздника, глас 2: Днесь

Всенепорочная:

(зри на стиховне утрени в 9-й день).

Славословие великое. Ектении и отпуст.

На литургии

Блаженны праздника, песнь 1-я первого канона, на 4 и святых, песнь 3-я, на 4. Прокимен праздника, таже святых, глас 7: Честна пред Господем смерть преподобных Его. **Стих:** Что воздам Господеву о всех, яже воздаде ми? **Апостол к Галатам, зачало 213. Аллилуиа праздника, таже святых, глас 6: Блажен муж,**

бояйся Господа, в заповедех Его восхощет зело. **Стих:** Сильно на земли будет семя его. **Евангелие от Матфея, зачало 10.** Причастен праздника, таже святых: Радуйтесь, праведнии, о Господе, правым подобает похвала.

**Бывает же на трапезе утешение братии,
довольно же и духовно.**

